



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

Tir Yimyim

tiryimyim@aolima

tir yimyim

TAPAK 3

Sudan mitkari envoy trok
mapa nungi anentsü

Tripura nung Congress
party-i longkak ait



VOL. XIX NO. 21 (ADOK 21)

DIMAPUR

ROGONÜ (FRIDAY)

MONGPUTENI (OCTOBER) 29, 2021

₹ 5.00

Department of Economics and Statistics pur workshop agi

Kohima, Mongputeni/Oct. 28 (TYO): Directorate of Economics and Statistics, Nagaland pur October 28, 2021 nü 'Support for Statistical Strengthening 2021-22' kübok statistical inyakyim balala indang workshop ka department indang Conference Hall nung agia liasü.

Iba sentong ayonger ka ama Advisor, Evaluation, Economics & Statistics and Fisheries, L Khumoi statistical staff temi taoba mapang terenlok mapa balala inyakba atema pelaba lemsatop aser ano maneni temolung agütsür inyaksü imlaba lemsatopa liasü.

Officer tem sendaka aliba department tem nung khen atema oa alirtem dang nungdakba data ajunga awajemtsü aser department dangi meyok tsüntga tejanga metetsü ajungshia liasü. Advisor-i parnok dang tekumdangba, tenendakba aser office-i teti arutsü ashi.

Sendaka aliba department nung statistics indang yimya aser nukjidong angatetsü aser department 34 nung yoka aliba statistical staff 124 inyakyim asadangsü atema iba workshop ya akar, ta Additional Director aser Head of Department, Neidilhou Angami-i ashi.

Statistical officer temi kanga

tongtipang shilem agir aser parnok ya department nem statistical data agütsüba nung sentaka aliba department indang tongtoret ka lir. Line department nung ketdangsürtemi maparen balala inyakba tali tajungba metetsü aser statistics bendentsü atema lenmangtem bushitsü meranger.

Ajidang masü iba workshop nungya ketdangsürtemi line department tem nung timtem ajuruba angatetsü meranga liasü.

Iba sentong nung Deputy Director, Theyieneinu Belho menden liasü aser Economics and Statistics officer, Nyusotho Nyuthe-i melepzüng o jembia liasü.

Iba anogo nung Advisor Khumoi-i Directorate of Economics and Statistics Nagaland ajanga adokba Nagaland Annual Price Bulletin 2021 sayaja liasü.

Küm shia state nung osettsüset balala indang jenjang department ajanga adokba ya nüburtemi shidakba nunga amshir asü masü, ta pai khuret ka lemsatopa liasü.

Consumer price index agi melaba ama osettsüset balala indang jenjang ateta yutsür aser item ya shidakba nung amshidaksütsü atema Economics and Statistics department ajanga tongti shilem agitsüla, ta pai ashi. (Maneni tapak 2 nung...)

COVID-19 Nagaland: Cases tasen 13 aser tasüba asem liasü

Kohima, Mongputeni/Oct. 28 (TYO): Nagaland nung Brehostibarnü COVID-19 cases tasen 13 jangjateta tang tashinung state nung iba tashidak agi meneper nisung 31,772 jungogo.

Tanü COVID-19 positive cases putetba ya Dimapur nung pungo, Kohima nung pezü, Mokokchung nung asem aser Phek nung ka alitsü, ta State Nodal Officer for Integrated Disease Surveillance Project, Dr Nyanthung Kikon-i anogoshi COVID-19 osang metetdaksüba nung shia liasü.

Paisa, tesüiba ghonda 24 tsüntga iba tashidak agi menepa alir nisung 22 - Dimapur nung 9, Kohima nung tenet, Longleng nung pungo aser Mokokchung nung ka taneptsü ngua tang state nung iba tashidak nungi taneptsü angur ajak agi nisung 29,822 alitsü aser taneptsü anguba rate ya shilem 93.93 alitsü, ta ashi.

Tang state nung active cases

210 lir aser item rongnung nisung 38 dak iba tashidak agi timtem agütsüba sümia lir, nisung ana tera timtem nung lir, nisung tuko kanga mejungi kangshir aser nisung 162 dak temang nung timtem agütsüba mali, ta pai ashi.

Mokokchung district nung nisung ana aser Zunheboto district nung nisung ka asüba ajanga tang State nung iba tashidak agi asür nisung 684 kumogo aser item rongnung nisung 15 dak danga tashidak keta liasü, ta Dr Kikon-i ashi.

COVID-19 tashidak keta alir nisung 1,034 tashi danga state temi ogo, ta pai ashi.

Tang tashinung Nagaland nung COVID-19 tashidak alitsü temolung melemteti sample 393,494 tendangogo. Item ya RT-PCR ajanga 110,856, TrueNat ajanga 85,715 aser Rapid Antigen Test ajanga 196,923 tendanga liasü, ta paisa ashi.

(Maneni tapak 2 nung...)

Subordinate Legislation aser Estimates Committee tem senden ayonger

Dimapur, Mongputeni/Oct. 28 (TYO): MLA aser Committee on Subordinate Legislation, Nagaland Legislative Assembly indang mendenpuba, Dr. Chotisuh Sazo-i iba Committee indang senden ka November 2, 2021 nü amentsü ayongzükogo. Senden ya Assembly Secretariat indang Committee Room nung November 2, 2021 anüngdang 11:00 ako nungi amentsü, ta ashi.

Committee züngsem ajunga iba senden nung arua adentsü metetdaksür, ta sangdong ka

ajanga ashi.

Ano sangdong danga ka nung Committee on Estimates, Nagaland Legislative Assembly indang mendenpuba, Zhaleo Rio-i iba Committee pur senden ka November 3, 2021 anüngdang 11:00 ako nungi tenzüka Assembly Secretariat indang Committee Room nung amentsü, ta metetdaksü.

Committee on Estimates indang züngsem ajunga iba senden nung arua adentsü mepishia metetdaksür, ta sangdong ajanga ashi

Dimapur Police-i NSCN/GPRN (Nikki group) züngsem asem apu



Dimapur, Mongouteni/Oct. 28 (TYO): Dimapur nung October 27, 2021 anepbongi injang kashishiba nung tai tonglokja alir NSCN/GPRN (Nikki group) züngsem asem Dimapur police-i puogo aser parnok ket nungi prangbong-injang den senotsü nguteta liasü.

October 27, 2021 anepdang 1:00 ako meta mejangjaba nisung kar gari nung arua Residency Colony, Nuton Bosti aser Nepali Bosti nung injang khashishia liasü, ta osang ka ajanga ashi.

Pua alirtem day arishi küm 31 tain Nikato Pilot Sumi,

Supervisor CFSB, SS. Kilonser NSCN-K (Nikki), arishi küm 28 tain Awang Konyak, SS. Sgt Major NSCN-K (Nikki) aser arishi küm 28 taon Wahkoi Konyak, SS. Sgt NSCN-K (Nikki) ta jangjatetogo, ta Deputy Commissioner of Police (Crime) & PRO, Dimapur sangdong ka ajanga ashi.

Police temi par asem ket nungi HK 33 Rifle (5.56 X45) ka, magazine ana aser indang 117, 7.65mm pistol (ITALY No.8536) ka, magazine ka aser injang 17, 9mm magazine ka, HK 33 rifle indang empty case

trok, 7.65mm pistol indang empty case ana, rifle lisü ka aser kotari ka ngutet. Par asem ket nungisa sen 1,82,700 den Bolero gari sentsü temesüng ka nguteta liasü.

Bushisüngdangba mapang police temi osangtsüsang balala bendenba den camera balala nungi CCTV footage tem nguteta liasü. Iba sülen tai tonglokja alirtem aputsü maparen tenzüka aser temolung melemi aliba gari ya nguteta par asem ya apu, ta osang ajanga ashi.

Iba maparen dak sendakba nung ken o ka benoka lir.

DALT aser DDCF ajanga khukhua aitsür

Dimapur, Mongputeni/Oct. 28 (TYO): Meimchir tiptema aliba maginer aser anemer kari tasü mait mapa inyaka aser tashiyim agi tesem danga nung Nagaland Police tanishir ama inyaker ka indang ki telungi aita tai maket pa kinungsü merenshiba atema Dimapur Ao Lanur Telungjem (DALT) ajanga khukhua aitsür, ta sangdong ka ajanga ashi.

Police tanishir indang kinungsü merenshiba sülen prangbong agi la dak toiter la indang mobile phone rakzüik aser raksatsü. Mapang tatsüka lir Residency Colony, Dimapur nung October 27, 2021 nü injang khashishia liasü.

Iba ama mapa tamajung inyakba aser amokmerenba ya khenyongi magizüiker aser Naga nung lakti tentet ajungai tesunep aginüa aliba mapang ka nung iba ama mapa inyaker ya tejakleni aoba lokti ka nung alitsü metemsü, ta DALT tir Aotemsu Aier aser tongti zülur S. Pangertoshi nati sangdong ajanga ashi.

Anungji onoki ozüng amshir aser State nung item ken o

ketdangsür dang aibelener nem bail magütsütsü aser nüburtim molungjang nung tetsübu aiddaksütsü bilema alirtem nem tatishitsü ka ama sayua tapet temerenshi agütsütsü ajungshir.

Nagaland Police officer alidak dena iba ama mapa tamajung inyaka alinung Dimapur nung aliba nüburtim kotasür tsüba malitsü. West Police station, Dimapur nungi Nagaland Police ajanga iba mapa tamajung inyaker mapang tatsüka tsüntga apuba atema onoki tentüngsang agütsür, ta DALT sangdong ajanga ashi.

Government of India den ceasefire agreement yangluba nung 'card holder' balalai prangbong bener senzütsü melaba mashi nung amshia Naga political group nungi jakzüka aor ajungai amshiba ajanga saru ang tali kumdaksür aser mapang shia tapi agi nüburtim amokmerener, ta ashi.

Anungji DALT ajanga Ceasefire Monitoring Board and Ceasefire Supervisory Board indang Chairman dang nüburtim ajungtsü mechi ceasefire ground rules kübok iba amala tashi mait

clauses ya jangjashitsütsü ajungshir, ta ashi.

DALT ajanga maneni tim ketdangsürtem den amalitep alitsü aser Dimapur nung nüburtim timi aliba amokmerena mapa tamajung inyaker nem tim obendang agütsütsü asoshi meranga inyaksü, ta sangdong ajangasa ashi.

Dimapur District Citizens' Forum-ia sangdong ka nung, October 27, 2021 nü Residency Colony nung Nagaland Police officer danga nung inyaker ka kidangi menüngdakba nisung kar tashiyim agi nungboka aita tai maket pa kinuntsü merenshiba aser anasa injang khashishiba atema khukhua aitsür, ta ashi.

Tejakleni aoba lokti ka nung tashiyim amshia nüburtim amokmerenba aser rara mesüba ya nisung ajaki aitsütsüla.

West Police station, Dimapur nungi Nagaland Police-i tekeratiba nung aibelener apuba atema tenüngsang agütsür, aser aibelener nem ozüng agi melaba ama tapet temerenshi agütsütsü ajungshir, ta DDCF ajangasa ashi.

Sorkar scheme dang nüburi shilem tuluba agi: Kapil Moreswar

Dimapur, Mongputeni/Oct. 28 (TYO): Central sorkari agütsüba scheme tem dang nungi nüburi shilem tuluba agiogo, ta Minister of State for Panchayati Raj, Government of India, Kapil Moreswar Patil-i ashi.

Moreswar-i ananü Nagaland semdangba mapang October 28, 2021 nü Dimapur nung Thahekhu Village Council Hall cum Multipurpose ki ka sayatsüba mapang pai iba olen ya jembia liasü.

Pai state trok semdanga jajaba nung pai semzüksüba Thahekhu Village Council Hall cum Multipurpose Building ya tulutiba

alitsü, ta ashi aser pai tesem balala semdanga jajaba mapang Naga nungeri mapa tajung inyakba aser nüburtim maparen balala nung shilem tulu agiba indang jembia senzütsü, ta shia liasü.

Mahatma Gandhi mangdang atalokja Ato Kilonser Narendra Modi-i yimtsüngtem ya yimitem dang nungi tajung kumdaksütsü asoshi inyaker, ta Union Minister-i ashi.

Nagaland nung United Democratic Alliance (UDA) kübok opposition maliba sorkar indang süoka jembiba mapang Patil-i state renloksü aser nüburi

ajungtsü mechi legislature tem lungjemba atema tenüngsang agüja liasü.

Iba ki semzükba sentong nung Nagaland Minister for Rural Development, Metsubo Jamir aser legislature Tovihoto aser Azheto nungertema arua dena liasü.

Iba sentong tembangba sülen Minister Patil-i Thahekhu Village nung ketdangsürtem den sensaksema liasü aser Kohima bushia ayameso.

Patil ya Dimapur-i Air India AI-709 nung aru aser Sovima nung Nagaland Chief Minister Neiphiu Rio ajurua liasü.

Peren DTF senden nung school lapokshitsü sensak asem



October 27, 2021 nü DC Conference hall, Peren nung COVID-19, Peren DTF aser district nung tanga Health Programs tem senden aliba noksa nung angur.

Dimapur, Mongputeni/October 28 (TYO): COVID-19, Peren DTF aser district nung tanga Health Programs tem Deputy Commissioner & DTF mendenbuba, Peren, Sentiwapang Aier, NCS lenisüba nung October 27 nü senden ka menogo.

Senden nung COVID-19 wara jenjang aser district kübok tang benoka inyaka aliba tanga sentongtem indang osang District Surveillance Officer, Peren, Dr. Dungkiabe-i agütsü.

School lapokshitsüba dak sendakba nung senden nung shilem agirtemi, COVID-19 inakyim shidak benoka

inyaksangshi masüba school tem nung regular class agütsü memelatsü lemetet.

Iba dak sendakba nung District Education Officer nem COVID-19 dak sendakba nung taruba tatidang agütsü asoshi par department nungi tetuyubatem jangjashitsü nongloksü.

Kasa mapang nung züngsemtemisa, school tem akhi ama inyaksangshitsü atema COVID-19 tashidak prokshia aoba nokdangtsü asoshi sorkari tetuyuba balala agütsür aliba sülen manidakba staff tem anema jenjang tapet agütsü telemteba agi.

Senden nungsa COVID Death

Ascertaining Committee züngsemtemi district nung COVID Grievances Redressal Committee züngsem ama khuret talila abentsü aser inakyimtem item committee yagi latettsü telemteba agi.

Maneni District Immunization Officer, Dr. Kiholi-i, district nung COVID vaccine agütsüba jenjang metetdaksü aser mendenbubai vaccine agütsüba team dang Block Task Forces nungi teyari agütsü shidang.

Senden ya mendenbubai züngsemtemi shilem tajung agiba atema parnok dang kanga pelaba lemsatepba sülen tembang.

Noklak nung e-Shram Portal awareness sentong agi

Dimapur, Mongputeni/October 28 (TYO): E-Shram Portal (National Database of Unorganised Workers) dak sendakba nung October 28 nü DC Conference Hall, Noklak nung awareness sentong ka agiogo. E-Shram Portal ya mapa balala inyaktertem atema lir, koba Ministry of Labour & Employment, Government of India kübok inyaksangshir.

Sentong nung o jembiba mapang Deputy Commissioner Noklak, Hiazu Meru-i, iba scheme kübok temsüa alirtem dang parnok tenüng züngoksemtüsü ajungshi. DC-isa, iba scheme tajangzük indang indanga agütsü atema Aadhaar card, bank account aser mobile number amala kuli kakettem nüngdaksü ta ashi. District nung iba scheme takok ngua benoktsü

atema district administration-i teyari agütsütsü renema lir, ta DC-i ashi.

Assistant Labour Commissioner, Tuensang (Noklak incharge) Lilongla Sangtam-i, sorkari tajangzük balala agütsüba agütsü atema iba portal nung züngoksemtüsü kanga tongtibang ta ashi.

Iba scheme kübok beneficiaries tem rongnung kisüjensür, bendanger aayangertem, Gig & Platform worker, kidang teyaritertem, aluyimertem aser tanga unorganised worker tem densema lir, ta lai ashi. Lilongla-isa unorganised worker tem tajangzük aser e-Shram portal nung züngoksemtüsü indang metetdaksü. Iba portal nung züngoksemtüsü sülen beneficiaries tem nem e-Shram

card ka agütsütsü, koba linük ajunga nung amshitettsü, ta lai ashi. Laisa, tenüng züngoksemtüsü indang metetdaksüba den arishi küm 16 nungi 59 tsüngda alir tem züngoksemtettsü, ta ashi.

Kasa mapang nung CSC center Noklak nungi Khengo-i iba portal amenokba nükjidong indang tejangja rasaa ashi.

Senden mendenbuba SDO (Civil) Noklak, C Phuniang-i, sentepa aliba lokti dang Noklak district kübok beneficiaries ajak nem iba osang agütsütsü aser scheme nungi tajangzük agütsü atema parnok tenüng züngoksemtüsü ayongzük.

Iba senden nung District Administration, Village Council chairmen tem, VDB secretary tem, Noklak jila ward chairmen tem aser worker tem dena liasü.

Election Commission of India-i metetdaksür

Dimapur, Mongputeni/October 27 (TYO): Election Commission of India-i sangdong ka ajanga, 2022 January 1 ji qualifying anogo ser Special Summary Revision 2021-2022 November 1 nü tenzüktüsü aser Noveber 30 nü tembangtsü, ta metetdaksüogo.

November 1 nü district ajak nung Electoral Registration Officer-

i, Rule 10 of Registration of Electoral Rules 1960 kübok Form 5 (Annexure 6), Rule 10 nung draft publication indang public notice ka agüja draft Electoral Roll sangdongtsü. Iba notice ya Nagaland kübok Polling Stations ajak nung angutsü. Maneni iba osang ya Chief Electoral Officer's website ceo.nagaland.gov.in nunga

angutsü.

Maneni DEO (District Election Officer) temi Political party balala den senden ka ayongzük amentsü aser Draft Electoral Roll indang copy ka parnok nem agütsütsü, ta Chief Electoral Officer, Nagaland V Shashank Shehar IAS-i sangdong ka ajanga metetdaksü.

COVID-19 Nagaland: Cases tasen...

(TAPAK 1 NUNGI...)

Bodhbarnü tashinung state nung nisung 709,015 nem COVID-19 mozü doses 11,91,433 agütsüogo, ta State Immunization Officer, Dr Ritu Thurr-i ashi.

State nung COVID-19 mozü agir alirtem ya frontline nung

inyaker nisung 60,960, healthcare nung inyaker nisung 15,998, arishi küm 45 nungi tema nisung 201,959 aser arishi küm 18 nungi 44 tsüngta nisung 430,098 alitsü, ta pai ashi.

Nisung 482,418 nem COVID-19 mozü doses tanabuba agüja

parnok vaccination course tembangogo. Parnok ya frontline nung inyaker nisung 47,903, healthcare nung inyaker 13,370, arishi küm 45 nungi tema nisung 159,387 aser arishi küm 18 nungi 44 tsüngta nisung 261,758 alitsü, ta Dr Thurr-isa ashi.



Molungyimsen Arogotsüri parnok yimtsüng nung nübertem nem bank ajanga rongsen renlokdaksüba sentongtem indang len sayudaksütsü asoshi SBI Regional Business office, Mokokchung aser NABARD nungi ketdangsertem anir arua agiba sentong nung adenertem agiba noksa ka yangi angur. Iba sentong ajanga yimtaklirtem rongsen bushibaren nung teinyaktsü aika angazükogo. (Molungyimsen, 28th Oct.2021).

BJP Dimapur District atema tir tasen shimogo

Dimapur, Mongputeni/Oct. 28 (TYO): BJP Nagaland tir, Temjen Imna Along-i BJP Dimapur District atema Tokuhö Suhoi Neho ya 'Adhoc President' ka ama

October 26, 2021 nü shimteto. Iba dak sendakba nung kuli kaket/osettsüset agütsütepba maparen anogo asem tsüngta tembangtsüla, ta metetdaksü.

Unity Day tenangzüktepba Oct 30 nü agütsü

Dimapur, Mongputeni/October 28 (TYO): Linük ajunga den Nagaland nunga October 31 nü Rashtriya Ekta Diwas (National Unity Day) ayongzük aamungtsü. Sardar Vallabhbhai Patel asoba anogo nüngtem nung küm shia iba anogo amunger.

Iba dak sendakba nung October 30 nü Secretariat Conference Hall nung sentong ka ayongzük lir, kechiyong October 31 nü Deobarnü lir. Unity Day tenangzüktepba agiba sentong ya Chief Secretary lenisüba nung 3:00 ako nungi tenzüka agütsü.

DAO Kohima-i metsüjangnatsü lemtsü



Dimapur, Mongputeni/October 28 (TYO): National Food Security Mission kübok District Agriculture Office, Kohima-i rabi ka office kima October 27 nü ayongzük aagiogo. Iba sentong nung Nagaland Building & Other Construction Workers Welfare Board, Government of Nagaland, mendenbuba Dr. Kekhrie Yhome alakteta jaoker liasü.

Alakteta jaokeri o jembiba mapang, food security ajangzüktsü aser tetsü tebou mapang nungi amshia aruba metsüjangnatsü balala wazük aayutsü koda tongtibang iba indang lemsatep. Pai, aluyimertem dang sobaliba shisatsü den inakyim tasen benoka inyaktüsü aser rongsenketsüng dak sendakba nung tangar dak metaloker malitsü atema chiyongtsü tali tsünütsü ajungshi. Paisa, lanur aser kaket shisatsü teperi ngur aliba lanurtem

dang aluyimba nung temlung agüja iba ya taküm libaliro ka kümdaksütsü ajungshi.

Kasa mapang nung DAO, Neikhotuonuo-i, Government of India-i tenzüktüsü National Food Security Mission indang lemsatepba den aluyimertem dang rongsenketzüng renloksü aser food security ajangzüktsü atema department den teka amteper inyaktüsü ajungshi.

Maneni sentong nung aluyimertem parnok nem technical tsütsü teyari agütsüba, metsüjangnatsü aser hadir balala agütsüba den senotsü agi teyari agütsüba aser Self Help Groups ajanga tetsürtem ajungmesoba atema kanga pelaba lemsatep.

Iba sentong ya Agriculture Officer, Kevizhalhou Kuotsu lenisüba nung agi aser Deputy DAO Kohima, Kekhrieletuo Yhome-i tepela anküp o jembiba liasü.

DoSE-i tenangzüktepba agiba sentong indang metetdaksü

Dimapur, Mongputeni/October 28 (TYO): National Unity Day mesera Rashtriya Ekta Diwas ya kümshia Sadar Vallabhbhai Patel asoba anogo, October 30 nü linük ajunga nung ayongzük aamunger. Taküm Rashtriya Ekta Diwas ya Azadi Ka Amrit Mahotsav den denchiteper.

Iba dak sendakba nung Directorate of School Education-i school ajak dang iba anogo nüngtem nung tenangzüktepba agiba sentong ka ayongzük aagütsü tetuyuba agütsüogo. October 31

nü ya Deobarnü asünung kaketshirtem school-i mejaoktsü saka tenangzüktepba ya virtually agütsü akok mesera Hokolbar/Honibar mesera Hombarnü ayongzük aagitetsü.

Maneni DoSE-isa, sentong agiba osang ya Photographs/Videos ka ana densema Online School Monitoring Portal (<https://school.dosenl.in/>) nung agüja aliba 'Activity Reports' Tab ajanga November 2 nü nikongtsütsü 1:00 ako matong tsüngda lemsateptsü metetdaksüogo.

Department of Economics...

(TAPAK 1 NUNGI...)

Iba Annual Price Bulletin 2021 ya 2010 küm ajemdaker yimtsüng, jila aser temeyoktep atema Consumer Price Index tasenba nung ajemdaker Directorate of Economics & Statistics, Nagaland ajanga adokba pezübuba alitsü.

Department ajanga base year 1981-82=100 amshia yangluba Urban Non-Manual Employee (UNME) indang CPI tejen mamshir.

National Sample Survey (NSS) 66th Round State Report for the Consumer Households Expenditure Survey nung

ajemdaker CPI tasenba ya yanglu, ta HoD Neidilhou Angami-i metetdaksü.

Weighing diagram nung rural sector kübok oset tabu 105, urban sector kübok tabu 130 aser combined sector kübok oset tabu 131 dena lir.

Series tasenba nung oset tabu 238 (weighted aser unweighted) indang jenjangtem district 11 nungi benden, koba nung urban prices centre 13, rural prices centre 22 nungi hopta shi bendenba jenjang inokja lir.

Wholesale prices ya Dimapur Urban Centre nungi bendenba liasü.

Tripura nung Congress party-i longkak ait



Tripura Congress-i Brehostibarnü longkak aйдang tangokba yangi noksa nung angur.

Agartala, Mongputeni/October 28 (Agencies): State nung nütsüing agi ajema aliba lokti amakba atema Tripura Congress-i Brehostibarnü longkak aitba sentong ka ayongzüka agiogo.

Tripura Congress-i, iba lendong atokdaksürtem anema jenjang tapet agitsü khanga Agartala kübok Congress Bhawan nung longkak aita liasü.

Iba masüidang Tripura Congress tekolakba Birajit Sinha-i, state nung tawa nütsüing agi ajema aliba lokti amakba atema BJP sorkar kanga mejungi aitsüogo.

"Kongsa BJP-i len anidir

idakji temzüing ozüing tsütsü tamakok alur," ta Tripura Congress tekolakba Birajit Sinha-i ashi.

Tripura nung nütsüing agia ajema aliba lokti amakba dak sendakba nung aibelena alirtem anema jenjang tapet agitsü khanga Birajit Sinha-i, state sorkar dang Mongolbarnü North Tripura district kübok Panisagar nung rally ka ayongzüka agiba mapang Vishwa Hindu Parishad züingsemtemi shirnok kisa rongtoktsüogo, parnok nem teyari agütsütsü khanga liasü.

"Onoki Tripura nung nütsüing agi ajema aliba lokti amakba khokhoa aitsür.

Sorkari aibelena alirtem aputsü atema jenjang tapet agitsüla aser lendong nung akoksar aliba kibongtem nem teyari agütsütsüla," ta Tripura Congress tekolakba ashi.

"Taoba hopta ka shi BJP den sendaktepa aliba lokti tentetemi Bangladesh nung tawa Hindu nungertem amakba anema longkak aita arudar. Longkak aiba sentong ayongzüka agiba nung kecha tai mali. Ajisüaka Bangladesh nung tatalokba dak ajemdaker Tripura nung nütsüing agi ajema aliba lokti amakba ya agizüktsü makok," ta Congress tekolakba Birajit Sinha-i ashi.

Meghalaya bypolls: Congress aser NPP pusemertem mangatettepadok

Shillong, Mongputeni/October 28 (Agencies): Meghalaya nung Congress aser National People's Party (NPP) pusemertem tsüingda mangatettepadokba sülen nisung 10 yiruogo.

Iba lendong ya Rajabala Assembly bypoll atema nüboyimtsü asoshi tatembangbuba anogo Bodhbar aonung Garodubi tesem nung ataloka liasü.

West Garo Hills district police sangdong ka ajanga ashiba agi, Garodubi nung rally

ka nung dener arur kari NPP candidate indang poster shisatsüba den NPP pusemer ka kidang long agi aonba sülen iba mepetmesü adok.

Iba tatalokba sülen security personnel tem iba tesemi aritepa ao aser tensa aziüoka liasü.

West Garo Hills district ketdangsür kati ashiba agi, iba lendong nung nisung 10 yiruogo aser parnok mozüktem nung temang anepaludar.

Iba tatalokba dak sendakba nung West Garo Hills district

police-i nisung kar pua lir.

West Garo Hills Superintendent of Police VS Rathore-i ashiba agi, tensa aziüoka lir aser temzüing ozüing shidak benoka inyaksangshitsü atema sepai talila yokogo.

Rajabala, Mawphlang aser Mawryngkneng Assembly constituency atema bypolls asoshi nüboyimba mapang Bodhbarnü tembangogo. Item menden atema October 30 nü election agitsü aser November 2 nü vote azüingtsü.

Assam: Police-i AJP rally nung shilem agirtem züka meinshi

Guwahati, Mongputeni/October 28 (Agencies): Assam kübok Guwahati yimti nung AJP-i ayongzüka, totzü aser tanga tenüingdakba osetem nung jenjang ajungkteba anema longkak aiba mapang police temi parnok züka minshia liasü, ta osang ajanga metetdaksü.

Osang ajanga ashiba agi, police temi longkak aitertem lathi agi züka minshiba mapang party lenir tejen Chittaranjan Basumatary densema AJP lenir aser züingsemtem aika yirua liasü.

Assam Jatiya Parishad (AJP)-i totzü aser tang tenüingdakba osetem nung jenjang tali aküma anema longkak aita liasü.

Brehostibarnü Assam Jatiya Parishad-i, Assam nung

tenokdangba kecha makai tenüingdaba osettem nung jenjang ajungkteba azüoktsü khanga Guwahati nung longkak aitba sentong ka ayongzüka agi.

Party tir Lurinjyoti Gogoi-i anir AJP züingsem aser parnok pusemertem noklang aika Guwahati Club nungi Kharguli kübok Assam Raj Bhawan leni longkak aita ao.

AJP lenir tejen Chittaranjan Basumatary aser Jagdip Bhuyan natia iba longkak aitba sentong nung shilem agia liasü.

AJP züingzemtem Angh aliba ki temeketi meyoktsü atema police temi tenokdangba agütsüba sülen longkak aitertem ya Raj Bhawan kima sota liasü.

Iba sülen police temi AJP lenir aser züingsemtem aika puogo.

Assam by-election: EC-i webcasting inyakyim benoktsü

Guwahati, Mongputeni/October 28 (Agencies): Election Commission-i October 30 nü Assam nung assembly menden pongu atema election agiba mapang webcasting anepalutsü telemtetba agiogo.

Election inyakyim nung ochi mashi inyakyim kecha malitsü aser nisung ajak tekümzüka kübok sadem sadema vote agütsüdaktsütsü atema iba jenjang agiogo, ta osang ajanga metetdaksü.

Webcasting inyakyim ya polling station 1,135 nung benoktsü, ta kasa osang ajanga metetdaksü.

Gossaigaon, Bhabanipur, Tamulpur, Mariani aser Thowra constituency tem nung By-elections October 30 nü agitsü lateta lir.

Election inyakyim kübok vote November 2 nü azüingtsü aser election inyakyim ajak November 5 nü tembangtsü.

Webcasting inyakyim benokba ajanga Election Commission ketdangsürtemi election inyakyim ajaka live asadanga litettsü, ta ketdangsür

kati ashi.

October 30 nü vote ya anepdang 7:00 ako nungi nikongtsütsü 5:00 ako tashi agütsütsü.

Security dak sendakba nung polling station ajaki Central Armed Police Forces personnel tem yoktsü, ta ketdangsürisa ashi.

Gossaigaon aser Tamulpur nung by-polls ya MLA süatokba ajanga agitsüsa aküm aser Bhabanipur, Mariani aser Thowra nungi MLA temi BJP nung adentsü atema parnok menden toktsüba sülen election agitsüsa kümogo.

Assembly meden pongu atema candidate 31 tokteptsü aser parnok shimtsü atema voter 7,96,456-i temsü lir.

Mizoram nung COVID-19 tensa tajungba akümer

Aizawl, Mongputeni/October 28 (Agencies): Mizoram nung Brehostibarnü nisung 547 dak COVID-19 tashidak potata ajak senteper tashidak mener 1,19,496 jungogo, ta ketdangsür kati ashi.

Maneni nisung ana asüba sülen tashidak agi asüra 424 jungogo. Nisung anaprongla ya Mamit district nungi liasü, ta pai ashi.

District ajak dang nungi Aizawl district nung nisung timba (255) dak tashidak potetogo aser Aizawl sülen Serchhip district (66) aser Champhai district (52) nung nisung timba dak tashidak poteta liasü.

Ketdangsüri ashiba agi, yashi positive rate 9.12 aliba tanübo 8 per cent dang lir aser tashidak potetertem ya sample 6,831 tendangba rongnung densema lir.

Brehostibarnü tashidak potetertem rongnung tanur 139 densema lir, ta pai ashi.

Mizoram nung Covid tashidak menar alir 7,320 lir aser Bodhbarnü nisung 991 taneptsü anguba sülen tashidak aneper 1,11,752 jungogo.

State nung recovery rate 93.51 per cent aser death rate 0.35 per cent lir.

Tang tashi nung sample lakh 12.93 tendangogo, kong Bodhbarnü 6,831 tendangba densema lir.

Maneni Bodhbarnü tashi nung nisung lakh 6.96 dak tema nem vaccine agütsüogo aser parnok rongnung nisung lakh 5.1 nembo dose anaprongla agütsüogo, ta state immunisation officer Dr Lalzawmi-i ashi.



NATIONALIST DEMOCRATIC PROGRESSIVE PARTY

"Facta non verba"

Date : 01/10/2021

NOTIFICATION

In exercise of the power conferred upon me, vide Art. VII. A (X) of the NDPP Constitution, I hereby call for the General Convention of the NDPP on the 23rd of November 2021, at 1100 hrs at the NDPP Office, Kohima, Nagaland.

(CHINGWANG KONYAK)

President



TIR YIMYIM

YIMOBILEM (EDITORIAL)

DIMAPUR ROGONÜ, MONGPUTENI(OCTOBER) 29, 2021

Tazünger maliba kaketreju

Arunachal Pradesh nung tazünger kata maliba kaketreju (school) 379 shibangba osang angashidang, Nagaland nunga kasa sentong aser mapaji ajizüka inyak nungbo government meyong rongsen aser nübo aika amajok nung lalushiponga alibatem nungi kümzükla ta bilemer. Nagaland nung government school ajak agi meyirijang ana dak tali lir aser school meyirijang ana nung jagi class A nungi 5 tashi lapoka aliba primary school tesadang ka shi lir. Item kaketrejutem nung sayutsü asoshi tesayur ajak agi meyirijang metsü shi lir. Item kaketrejutem aser tesayurtem jenjangji kodang medemdanga asadangdir, Nagaland nung government meyong kaketrejutem nung azünger kaketshirtem dang sayutsü tesayurtem peria dang lir ta angatetter. Ajisüaka, tebilemdangtsü tebilemtsü kaji, Nagaland nung lapoka akaba government school-tem aika nung tazünger mali kümogo. Iba jagi, school tanurtem dang nungibo tesayurtemang teimba aliba kaketreju aika lir ta angazüker. Ashiko, school meshibangnüba agi mesüra midday meal ama government nungi angutsüla teyari talila aginüba agi, tazüngerbo mali ser nung lir ama tiyazü school tanur tenüng agüja alitsüa akok. Iba jagi government rongsen amajok nung lalur aser tesayurtem aika mapai mao ita sen achiba agi asen loktiliba nung ochimashi saobaliba tamajung ka tentetogo. Mapa ajak rongnung tesayur mapasa aküm taketba aser temaba ta züngshir. Ajisüaka, asen lima nungbo tesayurtemiang mapai mao ita sen agizüka agia sayura mesüra pei melen tangar kar yoker ita sen lemdanga agia sayura, iba tesayuba jagi asen lima aser lokti menendaksüogo ta bilemdi. Item mapatemji miimshia masü jakdaka inyakba mapatem lir, ajisüaka government nung alirtemi kaketreju nung tazünger mali ser tesayurtem angati ita sen chia aliba tensa tiaji reprangshia, tanga state nung amaji tapet temelenshi bener arua meinyakra, School Education department-i anir Nagaland tai lenmangi anir asütsü. Kechi department aser kechi mapa nung südirsüaka, jungjunga bilemdanger nübertem asoshi tajangzük aser temoatsü kuma inyaktsü melen, department nung jenjang tajung ka ngutetra ojang mesüra ita sen ngura ojang ta inyakba sentong kaji, asen lima nung tazünger ali mali ta mali, middle school ajak class ter tashi tudaktsür, ano class 12 tashi azüngtsü asoshibo kaketreju peria melapoktsüba ya ka asütsü. Ano, kaketshirtem takoksa ngudaktsüba mapa kaji, tazünger alidak tesayur peria meyoker saka tazünger malidakbo tesayur talila ayur ta asüba shisa maka mapa ya asütsü. Alima ajungtsü asoshi tongtibangtibaji nübertem nem kaketshisatsü shitak agütsütsüba ya lir, kechiyong kaketshisatsü anguba agi tangatetba tajung agütsür aser iba jagi nisung ka senso tajung akümer. Ajisüaka, asen lima nungbo kaketreju lapokba ya tanurtem nem kaketshisatsü tajung agüja senso tajung kümdaktsütsü nükjidong masü, saka school ka lapokba ajanga 4th grade mapa nisung ka ana danga ngura aser nisung ishika danga tesayur mapa ngura ta asüba tangatetba agi lapokba amai kümogo. Iba jagi peon chowkidar ka ana den tesayur ishika angati ita sen angur saka asen chirnurtembo tamakitsü akümer. Tanü asenok alidak ajunga nung government-i lapokba kaketrejutem lir, saka item kaketrejutem jagi asen chirnurtem mesayutet, parnok aika drugs aser yi lar kümogo. Asen yimtak aser asen kiyong nung government school-bo lir saka tazünger mali aser tazünger aliyonga junga mezüngtetter ta süra maliang tajungba, kechiyong iba jagi asen chirnurtem sayutettsü melen mashileni anir. Iba tiaji government nung alirtemi metettsü tim. Aji oda, Arunachal government-i inyakba amaji, asen lima nunga tazünger maliba kaketrejutem ajak shibangtsüla aser ano tazünger aliyonga tazünger tanurtem dang nungi tesayurtemang teimba süra itemjia shibangtsüla. Iba jagi government rongsen aser nübo kümzükba dang masü saka tanüngba kaketrejutema tajungba akümtsü. Tanü tensa yabo government school mesüra private school ta masü saka tanurtemi schooli maodang azüngtsü aser zülutsübo shidoker alir, anungji tesayunütsüka aser class takdangji tesayur o tanurtem na shisalemsatetpak jangratemtsü tesem ka kümadoker. Iba ama putu nung school kidang tesayurtembo lir saka tazünger mali, tazüngerbo lir tesayur mali, ano tesayurtema lir aser tazüngertema lir saka tamendak menden mali ta asüba jenjang reprangshia inyaker mali nungbo, government-i School Education atema endokba rongsen aser nübo ajunga amajok nung endoker asütsü. Joko, asenoka züzüa melii Nagaland nunga School Education department ya lanurtem asoshi Independent bushitsür department asütsüla.

OLEMSABANG

YIMSÜSÜR

- P. Renthly Jamir

Aor sobaliba nung shirnok dang yimsüsür ta aja aser tanüa shir dang ajatsü. Iba onük ya lanur aikati metetnüa asüngdang nung ni angatetba Aori shirnok dang yimsüsür ta ajaba tanü tashi ajar, iba nung ojang ishika lemsateper.

Tanü asenoki putupur ta teimba amshir. Saka onok tanur asüadang iba melena TATAR ta teimba jembia aru. Ata-a akua aliba agi Tatar ta ajar. Aser kodang Tatar ta angashidir aji mesüng angashi nunga tsübua bilem. Tanep, taonung, ungkilang nung tatar senteper ta angashira yimer ajak tenarong meronger kechi asü, kar dang senchi menchi asü ta anga-ata. Tatar ozüng tsübu agi teti kümdanga ali, tapi agi meraratep, tangar meyong nung mesotak. Oda kidang tanur tamajung tsüraburi ashi manga nunga Tatar nem pur-oa agütsütsü ta amokmeren. Israel nungertema tsüraburi mazüoktetba tanur yimti tambur nem pur oa agüja parnoki lung agi onseta entok, Taza-21:18-21. Tatar ozüng tsübu agi kibong telung nung tashi sünepa aliba agi ozüng raksar, tashi manger bulua mali asü.

Alima otsü zülur Dr. B.B Gosh pai ashiba agi Aor ya Chungliyimti lima A.D. 1070-1100 shi tsüngda lir A.D. 1200 shi nung Ungma bushia adoker alitsü südi. Kümji kwi südir süang saka Aor Chunhliyimti alidang küm 30 shilang putu menden alangtet aser tanü aji maneni benshir. Alima democracy government balala ajak rongnung yimsüsür ajakdang tashi tulutibaji Aor putu menden nung aliba Tatar ya lir. Ano inyakyim tajungtibaji ibai lir. Kechiba tashi tulutiba parnoki temzüng ozüng ajak yanglur (legislature) aji mapa kuma bener aor, (executive) aser parnokisa obendanger, (judiciary) kechiba tajungtiba yimsüsür ta ashir, iba menden nung kin tilaba nungi tuluba tashi pei kini nisung tetemsüba shimmer yoker, par kinbo maten ta mali (equal).

Parnok yamaji tashi tulu saka parnok taah kecha maka yim saru parnok tama agütsütsü, yim tongpangi parnok tamsür aitsü, putu atsüngdang longmi sabangi tur aibelenerbo tetsü, tebu ta kecha tejak mereprangi Ak mang süzüka achitsü ta azüngashir asünung teti ochi o bendang agütsütsü bilema yimsü asür. Anungji J.P. Mills shibai "THE AO NAGAS" kaket zülü, pai yamai shia angutsü, "The village elders who are sitting in the judgement are always impartial." Aori yimsüsür ta ajabaji item dang ya ja-a aru aser tanü tashi parnok dang ajar. Anungji lai nunga yimsüsür ta meyipzuka alibatemji kar reprangdangdi.

Rom- 13:1 nung governing authorities/higher power tematiba tashi akartem ta lir yimsüsür.

Api Shin- 31:4 nung Rulers/Princes (a royal ruler) yimsüsür chuba kin. Ano Yob- 29:9 nungbo Chief men/Princes nisung rongnung tokolakba chuba kin chuba senmanger yimsüsür kin ta lir. Kechiyong tapi agi yimsüsür ta majar.

Tanü nübur aikati village council ta asüba ya putu menden den aiteper. Village council yabo Nagaland governmenti küm pungo atema shimmer. The Nagaland Village and Area Councils Act, 1978 chapter I NO.6 (a) nung State governmenti manentsüra parnok shimba anogo nungi küm pungo inyaktsü ano atsülangtsü akok ta lir. State governmenti shimmer governmenti anentsütsü akok. Parnok ya governmenti melaba dang inyaktsü, temerenshi tulu agütsütsü makok, senchi tulu achitsü makok. Parnoki yimtsüng terenlok mapatem ajaayangtsü saka yimsüsür ta majatsü. Saka Tatarbo yamaji masü parnok shinga kübok masü, saka shitakba yimsüsürtem lir.

Aikati council ta asüba ya yimsüsür tashi abener ta bilemer. Council tetezü meeting ta local ta-ang agüja lir. Tanü asüng town tila nunga nütsüng yongsük yazü tali tapong zülutena yur town council ta town committee ta ano Ward Chairman, All Ward Chairman ta, Senso Executive ta kari aibelena onok yimsüsür ta jembir. Ano Gaon Boratem ya-a government tenyartem lir. Lai nungbo Alimelen sarur publican ta tax collector ta ajar. Parnok ajak

ya lokti tanishir saka yimsüsür masü. Parnoki yimli alanga maka. Ano D.C, S.D.O parnok ya-a yimsüsür tam ajar. Administer to manage carry out yimsüsürtemi ozüng yanglua yutsübatem ajaayanger. Parnok madak ozüng yanglur M.P/M.L.A tem lir. Akidang Aor yim shiaji independent (city state) kaka liasü, Tatartemji ozüng yanglur aji ajaayanger o bendanger parnok madak shinga mali. Anungji yimsüsür ta ja-a aru.

Koda asütsü alimai memoa nübur tia maka tanü asen tendak pei pei kin tebu, tebou aso taren shitepa Tatar menden nung mendaktsüba, Ao lima yimtsüng aika nung sangkeni pei nung memetet ama Tatar tashi (power) memeteti alanger atartemi election aru shia Tsünü shishi ama jenjang tuluba rüjia yoktepbba nübur narongi angashir, tenüki angur, kechiyong shiti kolak alu per agi kübanga ayutsü makok. Aser Chungliyimti shilang mesenmetoa Ita, Anü tsüngrem dang azüngashia nangzükba tamakitsü kümdaktsür. Joko ita dangbo petinu tejakjaba kümdi ta Senso Executive ta Bendang alir Uniona ta senteper yimtak tebu, tebou menden alanger yimsü asür hau ta mali tashi amshiteper. Yamaji saka Tatartemi itemji aramoka tashi mamshiteti yimtak petsapetperonga yimli tero maket kümdaktsür.

Tanü Naga lima teraksa tia ya yanglushidi süra mezüngbuba Ao lima yimtsüng ajak nung putu menden ya tama akimapang amato akhümketa wazüka ayutsüla. Tatar shirnok dang yimsüsür ta ajar parnoki ochi shia yimsü asütsü nübur ajaki nongittsüla. Israel lima asenok ama ya aiatai tia nung alidang tamangertemi, "Alemlü ama ozü anogo tasen kümjangma" ta kibuba dang ayimtenba ama arogopurtemi yimsüsür asoshi inyaktsüla. Kodang Ao lima nung putu menden akhi ama yangerteta yim ajak lirumedema nüburtemi Tatar yimsüsüba kübok tashi anga litetdir alimaji mejungiang malitsü. Aser Naga nunger ajak Aor jilu ajir asünung Aor melenshiba den külemi parnok melenshitsü.

Lokti tentet tanishir aika rongnungi Aori shirnok dangang yimsüsür ta ajar tang angatetogo. Anungji item yimsüsürtemi pei NÜNGJA angateta nübur madak yimsü asütsü. Nübur ajaki Lai nung melaba ama yimsüsür bangdak tashi anga alitsü süra asen lima mejungiang malitsü ta bilema iba onük tazünger ajak den shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nepal nung South Korea tsür missionary ana jail nung puoka lir



Nepal kübok Pokhara Bus-Park slum nung aliba Happy Home nung Sister Martha Park Byongsuk-i sensaker tanurtem den külemi chiyungba mapang tangokba noksa ka yangi angur. Tang la aser Sister Gemma Lucia Kim na police-i pua lir.

October 27, 2021: Nepal linük nung South Korea nungi missionary ana apuba sülen hopta trok tashi mechioker; Korear tsür anaji Catholic nuns lir, aser tenati mesüzüka nisungtem Khristan yimsü dangi meyipdaksür, ta tena nem tai tonglokja liasü.

Sisters of St. Paul of Chartres nungi Sister Gemma Lucia Kim aser Sister Martha Park Byongsuk na September 14, 2021 nü apuba sülen police ket nung ayu; tenati bail nung chioktsü atema mepishi saka temepishiba magizüki September 27 nü district jail nung puoka liasü.

Nepal yimtiba, Kathmandu nungi kilometer 200 shi pilar aliba Pokhara nung nun ana jagi sensakertem aliba tesem ka nung tanurtem anepalua liasü.

Aid to the Church in Need (ACN) den jembidang Nepal nung tongti putir kati, "Court-i bail temepishiba magizükba ajanga linük nung Catholic Khristantem süngmanger," ta

ashi.

"Sister ana nemji bail agütsütsü ta nangzüka liasü saka magütsü. Iba ya sister tem anema inyakba dang masü saka sensakertem sendokba lir," ta putirisa metetdaksü.

Putiri jail-i oa nun anaji ajuruba sülen October 24 nü tamangertem dang nun ana atema sarasademjang, ta mepishia liasü.

Arogo lenir kati, item ama osang mimbangba ajanga Hindu yimsü alia amangertem aser Khristan anemertem media-i osang tai proktsü, ta ashi.

Tamalen Nepal nungsa Protestant pastor ka densema Korea nung anata pua liasü.

Missionary nun ana jagi Happy Home nung sensaker tanur 120 shi nem chiyungtsü, shisaliok, medical teyari aser skills training agüja liasü.

Coronavirus wara tamajungba mapang nunga parnoki sensakertem nem chiyungtsü lema agütsü, ajisüaka Hindu nungertemibo

nun tem jagi Hindu nung Khristan yimsü dangi meyipdaksütsü atema chiyungtsü agüja mesüzüker, ta tai tonglokja liasü.

Putir Paul Simick-i, "Tenati tamangba yimsü meyipdaksür, ta tai tongloktsübaji khenyongi tamendakdak maka. Iba ya sister tem anema dang inyakba masü saka sensakertem nungdak sendokba lir. Khristan ka ama onoki kangshia tamangba yimsü memeyipdaksür. Korea tsür sister temi tenzüka mapa tajung aika inyaker," ta metetdaksü.

"Sister ana jagi tesüiba küm aika sensakertem tenzüka aruogo. Anungji tang tatalokba ya jungjunga bushisüngdangtsü nungdak," ta paisa ashi.

Nepal nung nütsüing million 29 shi lir aser iba nungjagi nütsüing shilem 81 Hindu nung lir, shilem 9 shi Buddhist yimsü amangertem, shilem 4.4 shi Muslim nung aser Khristan nütsüingbo shilem 1.4 shi dang lir.

Haiti nung puer aoba pastor kachiokogo

October 27, 2021: Tawa Haiti linük nung 400 Mawozo teloki America nung missionary 17 puer aoba sülen parnok chioktsü atema jembiba mapang ka nung tamalen puer aoba nung America nung pastor arrshi küm 79, Jean Pierre Ferrer Michel bo chiokogo; pa chioktsü atema 400 Mawozo telok nem dollar sen 550,000 agüja liasü.

Michel'er jalai Facebook post ka ajanga tebu chiokba osangji sangdong.

Haiti kübok Delmas 29 nung Jesus Center lapokertem rongnung Michel densema lir. October 3 anepdang 8:00 ako meta pa Tenla kidang lia prangpong amer telok kati pa den Isabelle Devendegis aser Norman Weiner nung puer

oa liasü.

Par teloki tetsürlabo (Isabelle) chiok saka Michel aser Weiner nabo mechioki liasü. Kinüngertemi par asem chioktsü atema sen 300,000 agütsü saka tetsürla dang chiokba ajanga Michel aser Weiner na chioktsü atema Hombarnüa sen 250,000 agütsüsema liasü.

Osangbenertem den jembidang America nung kati, "Parnoki America nung 17 puer aoba atema dang jembir saka pa (Michel) atemabo mejembir. Pa-a America senso ka lir," ta ashi.

Michel bo chiokogo aser tan ita tomlen apuba America nung missionary 17 bo tang tashi mechiok. Parnok ajak chioktsü atema dollar sen million 17 akhanger.

Christian Aid Ministries-i Bodhbarnü missionary tem atema temeja sarasadem agitsü aser lumitsü atema ayongzüka liasü.

Mongolbarnü Christian Aid Ministries-i sangdong ka ajanga, "Tawa ozü züngsemtem apuba osang kanga bulua jembidar, ajisüaka lokti tentet katibo taküm January nungi September ita tashi nung Haiti nung nisung 600 dak tema puer aoba osang metetdaksüogo. Yakümbo January nungi September tsüingda nisung 231 dang puer oa liasü. Sarasadema aser lumiba mapang nung parnok (America nung missionary tem) dang masü saka puer oa alir ajak bilemtetsü mepishir," ta metetdakja liasü.

ANOGO ABEN TSÜNGREM DEN

Tsüngremer o nung atentenba

Saka shiba ajemalu aser tanela teraksa ali aser shibai Kü O nung atentena ali,

Pa dang ni reprangtsü. Isaia 66:2.

Kodang Tsüngremi jembir nai atentener asü? Takoksang Tsüngremi ne jembiba aser ne shi temang kongshiba tatesa jembibaji kodang liasü? Kodang Tsüngremi Yohan den jembi pa tashi ajak lulaa aküm (J.A. 1:17). Kodang Pauli Damaska among nung Yisu ajuru aser Yisui pa den jembi pa ali nung lao (T.M. 9:4); aser kodang Peteri Yisuji shiba angateta aru pai Yisu tsüngdang apudak aser ashi, "Ni nungi pilaang, kechiaser ni temenen nisung ka lir, O Kibuba!" (Luke 5:8).

Teyanglusangi tanga ne den jembir ta bilema marur asü? Temeshiba yimlaa nai Laishibaji azünger asü, taküm melenshidaktsüba O Tsüngremi tanü ne den jembiba angar asü. Laishibai ashir, "Kibuba tsübubaji shisatsü tetenzük lir" (A.Shin 9:10). Idakji nai tetsübu agi angatsüba aser ajak nung Tsüngrem akhüm tsübutsüba mapatem lir.

Nai Lai azüngdang, nai azüngba tekong kar ajanga Tsüngremi ne den indang indanga jembir ta nai angatetsü. Tsüngrem shibai jembi aser alima ajunga yanglu iba tesüngmangtsü shisadangang, Pai tang ne den jembir ta shisadangang. Yisui jembi aser tasür shia arudaktsü, yipru süngjemdaksü, temenen tanelatem aridok aser tashi anebtsü süra Pa nungi aruba O jagi ne taküm nung kechi inyaker? Ne dak ataloktsü takoktsüji atentenba? Tanaben nai Laishiba, temeshiba teyimla nung aji lapoka züngang.

Tan hopta tatembanglen PM Modi-i Pope Francis ajurutsü

October 28, 2021: India Ato kilonser, Narendra Modi-i Europe semdangba mapang pai Vatican nung Pope Francis ajurutsü, ta Cardinal George Alencherry-i metetdaksü.

October 27, 2021 nü Eastern-rite Syro-Malabar Church nung tekolak aser Kerala Catholic Bishops' Council Tir, Alencherry-i sangdong ka ajanga, Ato kilonser Modi-i October 30 nü Pope ajurutsü, ta metetdaksü.

Official osang ka ajanga pai iba osangji jangja aser Modi o Pope na ajurutepbaji kanga tongtibang asütsü, ta pai ashi.

"Iba ya ajanga asen linük nung Arogoi Vatican aser Catholic Arogo den tesendaktep tajungba yanglutetsü," ta pai metetdaksü.

Taoba hopta External Affairs Ministry-i, October 29 nungi November 2 tsüingda Modi-i Rome aser Glasgow semdanga G20 Summit aser World Leaders' Summit of COP26 senden na nung adentsü, ta sangdongba sülen media-i Pope aser Modi na senden amentsü, ta imlaa liasü.

Ajisüaka tang tashi nungbo India sorkar mesüra Vatican napronglai official süa tena senden amentsü osang sangdonga mali.

BJP aser Hindu teloktemi India ya Hindu linük ka kümdaktsüner, aser Pope-i India semdangtsü atema parnoki memelunger.

1999 küm nunga St. Pope

John II-i India semdangtsü tebilemba liasü saka Hindu telok aikati ibaji anema nokdak. Iba kümji Pope-i Asia nung Ecclesia tenzüka liasü.

Pope-i India semdangra ibaji ajanga linük nung Khristan missionary mapatem ajungmesotsü, ta bilema Hindu teloktemi anemer; India Arogoi Pope jaoktsü atema merangaka ibaji ajanga Hindu teloktem jashitsü ta bilema Modi sorkaria temelung magütsür.

Arogo lenirtemi, India nung Khristantem reshikangshiba mapang nung Modi aser Pope na senden menra ibaji ajanga Khristantem ajangzüktsü, ta jembir.

Taoba mapang Catholic Bishops' Conference of India nung otongdar, Babu Joseph-i, "Modi aser Pope Francis na ajurutsü sentong alibaji junger. Pope Francis-i mapa tajung aika inyaktetogo aser meimchir dak sendakba tongti teblemtsü önük aika atema inyakogo aser pa olaji alima nung lenirtemi angar. Ibayongji US ama alima nung tashi tulu aliba linük nung Tiria Pope Francis ajurur aser shisa meshir," ta metetdaksü.

India nung Arogo lenirtemi Pope Francis jaoktsü atema aiben mepishiogo saka sorkari magizüker. Taküm February ita nunga Mumbai nung Cardinal Oswald Gracias den Cardinal Alencherry aser Cardinal Baselios Cleemis nungeri Modi dang Pope jaoktsü atema mepishia liasü.

OLONG PAITEP # 5980

| | | | | | | | | | | |
|----|---|----|---|--|----|--|--|---|--|----|
| | 1 | | | | 2 | | | 3 | | 4 |
| 5 | | | | | | | | 6 | | |
| 7 | | | 8 | | | | | | | |
| | | | | | | | | | | |
| | | | | | | | | 9 | | |
| | | 10 | | | | | | | | |
| 11 | | | | | | | | | | 12 |
| | | | | | | | | | | |
| | | | | | 13 | | | | | |
| | | | | | 14 | | | | | |
| 15 | | | | | | | | | | |
| | | | | | 16 | | | | | |

| | | | |
|-----------------------|-------|-----------------------------|-------|
| TIPILEN | | LANGTSÜNGLEN | |
| 1. Balaka | - (5) | 2. Hai sür inyak | - (4) |
| 6. Aika shirangba | - (4) | 3. Aor tenüng ka | - (6) |
| 7. Tar tatsü | - (6) | 4. Ali telungi talangka lur | - (5) |
| 9. Nenü'er jabaso | - (4) | 5. Tebang kenyongi mazüoker | - (4) |
| 10. Sen latettsüba | - (7) | 8. Ken atema anenzükertem | - (5) |
| 11. Tangar kübok alir | - (4) | 9. Toktepa noktak | - (5) |
| 14. Lon nung inokba | - (6) | 10. Sen | - (6) |
| 15. Tzü ayimdak | - (4) | 11. Benjong agi | - (5) |
| 16. Ajok | - (5) | 12. Telung nung rizünga ayu | - (4) |
| | | 13. Tebang nung enok | - (4) |

OLONG PAITEP # 5979 TELANGZÜBA

| | |
|---------------------------------------|--|
| TIPILEN : | LANGTSÜNGLEN : |
| 1. Aben, 4. Artsü, 7. Lisem, 8. Liwa, | 1. Aruli, 3. Balala, 5. Suwar, 6. Belem, |
| 9. Sarasadem, 12. Aket, 14. Mangu, | 9. Süjak, 10. Aonung, 11. Dokan, |
| 15. Anünü, 16. Ango. | 13. Tinu. |



YIM COMMUNITY HALL TASEN YANGLUTSÜ SENTONG ATONGER

Chairman : Hai külem yimsürtem...Community Hall ya joko tejen kümadokogo...asen kidanger tangar yimerbo ajunga RCC ki tulu-lu atongtepa yangluba nguogo...Asen yimer-a joko tejenba ya bendoker RCC agi tuluka yanglutsü Project yangludi hangjong.

Gaon Bura : Aji shitaka... Küna tia kaa asen yimer Cabinet Minister lirji pa nem LADP Fund nungi Lakh-50 bener arutsü lezmüksüdi...Commissioner-bai anir Gazzeted Officer aika lir-ji parnok ajak nem nisung shiai Rs.50,000/- bener arutsü lezmüksüdi...Tanungba itasen achir ajak nem Rs.5000/- nisung shia lezmüksüdi...ta nibo bilemer ato.

Tazüngbur : Tang Gaon Bura-bai ashibaji noklang nung noklang shitak shiogo... Yangji tang temdi.

Chairman : Hoi külem yimsürtem...Tangar dak metaloker yimten mapa meinyaktsü...Minister-ji asen yimer atema dang masü Constituency nung aliba yim ajunga atema.... Anungji pa nem khuret magutsütsü... Aser Gazzeted officer o Service-wallatema itasen agi chirnur education agutsütsüba...Pei kibong khuret tulu lir...Anungji parnok shinga nema khuret magutsütsü...Oda aseni akoktsüba asen tashi yari ka yanglutsüba sentong atongdi.

- Lilir : L.Kika Pongener.

TANÜBO NAI LANGZÜANG

Q. Koba küm International Day of Diplomats mezüng amung?
 A.2007 B.2019 C.2017 D.2001
 =====(Taruba adok nung onoki langzüksü)
YASHIADOK TELANGZÜBA : Aurore

AO OSHI ANGAZÜKDAK:
TANÜ ANGAZÜKTSÜBA OJANG

Lemtet
 (v) ken o renem (decide)
 * Ni' tamajung meinyaktsü **lemtet**.

Lemtsü
 (n) tokolak nung ku mali (bald)
 * Tsüngrem tenzüker aika **lemtsü** akümer.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA



'Motor Vehicles Act' kübok tsüngsem (shoe) masem chappal, slipper, sandal mesüra floater semer motorcycle aniba atema senchi 1,000 achitsü akok. Ano Motorcycle anirtemi tanaben aibelenra, anogo 15 tashi tepuokdak ayutsü asoshi iba Act nung temzüng yanglua lir.

SUDOKU # 6021 TELANGZÜBA # 6020

| | | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|---|
| 7 | 1 | 3 | 9 | 2 | | | | | 1 | 2 | 4 | 6 | 8 | 5 | 9 | 3 | 7 | |
| | 9 | | 1 | | 4 | 8 | 3 | 2 | | 7 | 6 | 5 | 3 | 1 | 9 | 8 | 2 | 4 |
| | 8 | | | | 3 | | | | | 8 | 9 | 3 | 7 | 4 | 2 | 5 | 1 | 6 |
| | | 9 | 7 | | | 1 | | 5 | | 5 | 8 | 1 | 4 | 3 | 6 | 2 | 7 | 9 |
| | 3 | 2 | 5 | | 6 | | | 7 | | 2 | 3 | 7 | 5 | 9 | 1 | 6 | 4 | 8 |
| | | | 4 | | 1 | | 8 | 3 | | 9 | 4 | 6 | 2 | 7 | 8 | 1 | 5 | 3 |
| 3 | | | 2 | 1 | 5 | | 7 | 9 | | 4 | 1 | 9 | 8 | 2 | 3 | 7 | 6 | 5 |
| | 2 | 5 | | | 7 | 3 | | 6 | | 3 | 5 | 8 | 1 | 6 | 7 | 4 | 9 | 2 |
| | 7 | | 3 | 6 | | | | | | 6 | 7 | 2 | 9 | 5 | 4 | 3 | 8 | 1 |

OJANG LUTEP # 5567

BATENG :

ANAGIDG :

NSABEA :

BIBJEMA :

SÜMA :

PAMA :

IAAG :

YAKINA :

YUSA :

UNGTAJBA :

OJANG LUTEP TELANGZÜBA # 5566

TAKÜM TERAкса BENER TSÜNGREM BUSHIA
 ARURTEM NEM KOTAK KICHIBA LAPOKTSÜR

TAN HOPTA ATEMA - KOMA SÜLA ?

Q. Naga nunger yimten tebilemtsü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

India aser Asean tsüngda tesendaktep junga lir: PM Modi



October 28, 2021 nü Brunei ASEAN Summit-i sayaba noksa nung, Association of Southeast Asian Nations (ASEAN) senden aliba mapang ASEAN-India jurila senden nung India Ato kilonser, Narendra Modi-i jembiba noksa nung angur. Myanmar linük medensemi Southeast Asia linüktem nungi lenirtem senden ya October 26, 2021 nü tenzuka liasü.

New Delhi, Mongputeni/October 28 (Agencies): Brihostibarnü video conferencing ajanga 18buba India-Asean senden nung jembidang Ato kilonser, Narendra Modi-i, India-Asean tesendaktep kanga junga lir, ta metetdaksü.

ASEAN telongjemji India atema kanga tongtimbang; Indo-Pacific region nung kasa mangdang yur inyakba aser amalitepba tamendakdakji India nunger Indo-Pacific Oceans

Initiative (IPOI) aser ASEAN Outlook for the Indo-Pacific lir, ta pai metetdaksü.

India-ASEAN partnership yangluba sülen 2022 küm nung küm 30 ajungtsü, aser iba kümji 'ASEAN-India Friendship Year' amongtsü; iba dak alia India nunger nüchiso anguba sülen 2022 küm küm 75 ajungtsü, ta paisa ashi.

ASEAN (Association of Southeast Asian Nations) ya rongsenkettsüng tsütsü

Southeast Asia nung aliba linük 10 tentet ka lir, aser züngsem linüktemi parnok tsüngda dang masü saka Asia nung tanga linüktem atema-a rongsenkettsüng, yimtenren, security, military, shisaliok aser sobaliba tsütsü lenmang lapokja tesendaktep yanglur.

Modi-isa, Covid wara mapang nung amalitepa inyakba ajanga tarutsü nung India-ASEAN tesendaktep ano tashi taitba akümtsü, ta ashi.

Centre-i Nov. 30 tashi Covid wara tenokdangbatem atsülanger

New Delhi, October 28 (Agencies): Brihostibarnü Ministry of Home Affairs (MEA)-i November 30, 2021 tashi coronavirus wara dak sendakba tenokdangba balala atsülangba osang sangdongogo; benjung mongpu atongtsü lia wara prokba nokdangtsü atema iba telemtetba agi.

MHA-i wara nokdangtsü atema tetuyuba pongu-tendangtsü, contact trace asütsü, treatment agitsü aser vaccine agitsü, iba denji külemi wara anema tetuyuba balala benshitsü metetdaksü.

MHA tetuyuba kübok containment zones aser covid case shilem 5 dak tema putetba district tem nung lokti adenshitsü memelar.

COVID positive rate shilem 5 aser iba dang nungjagi tajemba aliba district tem nung

ang lokti adenshitsü melatsü, ajisüaka jelia temelaba meshitsüla, iba sülen nisung kwi tashi adenshitsüar latettsütsü. Item ama lokti senden nung nisung tsüngda tetsüngda itta alitsü aser mask agitsü.

COVID-19 tenokdangbaji states aser UTs-i benoktsü aser mita reprangtsü.

India nung coronavirus case ano tera tali putetba ajanga Home Ministry-i iba telemtetba agia asütsüa akok, ta bilemer.

Tesüüba ghonda 24 tsüngda India nung nisung 16,156 dak coronavirus putetba aser iba tashidak agi shiranger 733 asüba osang Union Health Ministry-i metetdaksüogo.

Tang tashi nung India nung nisung 3,42,31,809 dak iba tashidak putetogo aser iba tashidak agi shiranger ajak

senteper 4,56,386 süogo.

Tang India nung coronavirus agi teshirangdakpur 1,60,989 lir, aser ibaji coronavirus caseload nungi shilem 1 lir, ta Health Ministry-i metetdaksü.

Tesüüba ghonda 24 tsüngda shiranger 17,095 anepogo aser shiranger anepba shilemji 98.20 jungogo, ta health ministry-isa metetdaksü.

Bodhbarnü samples 12,90,900 tendanga liasü aser tang tashi nung samples ajak senteper 60,44,98,405 tendangogo, ta Brihostibarnü ICMR-i metetdaksü.

Tang anogo shia coronavirus positive putetba shilem 1.25 dang lir. Taküm January ita nung coronavirus vaccination program tenzükba sülen tang tashi nung vaccine dose crore 104.04 dak tema agütsüogo.

Pegasus committee nung adentsü aikati memelung: P Chidambaram

New Delhi, October 28 (Agencies): Brihostibarnü Congress lenir, P Chidambaram-i, Supreme Court-i Pegasus ken o bushisüngdangtsü atema tentetba committee nung adentsü asoshi nisung aika dang asüngdang saka aikati memelung, ta sangdongba osangji ajanga pa süngmanger, ta ashi.

Pegasus ken o bushisüngdangtsü atema Bodhbarnü Supreme Court-i züngsem aseme akümba committee ka tentetogo.

Chidambaram-i twitter ajanga, "SC sangdong ka ajanga, Pegasus ken o bushisüngdangtsü atema committee nung züngsem asütsü asoshi nisung aika dang pemishi saka magizük, ta metetdaksüba ajanga ni süngmanger," ta metetdaksü.

Linük atema kanga tongtimbang onük ka atema inyaktsü asoshi Supreme Court-i asüngdangaka sensotemi memelunger?, ta pai ashi.

"Iba ya ajanga, Mahatma Gandhi-i, India nungeri yimsüsürtem metsübuttsüla, ta jembiba o nungi asenok talangka pilaba jangjar," ta Chidambaram-isa shisem.

Bodhbarnü Chief Justice NV Ramana leniba nung züngsem aseme akümba bench kati, ozüng ajanga yimsüsüba democratic linük ka nung sensotem itdangitbaji ozüng alema lir, aser ibaji memelatsü, kechiyong linük temzüng ajanga sensotem temeden kümzük, ta

metetdakja Pegasus ken o bushisüngdangtsü atema SC-i mongin aseme akümba committee ka tentet.

Supreme Court-i Pegasus ken o bushisüngdangtsü atema committee ka tentetbaji opposition party aikati pelaa agizükogo.

Congress lenir, Rahul Gandhi-i, shidakba agibo iba ken o bushisüngdangtsü atema Ato kilonser aser Home Minister nati tuyutsüla asü, ta ashi.

Paisa, Ato kilonser ya linük dang temaba masü, aser iba ken o atema pai telangzüba agütsütsüla, ta ashi.

Left party temi, linük security nung ajemdaker mapang ajak nung sorkar jenbuttsü makok, ta Supreme Court-i ashibaji tim dang shiogo, ta metetdaksü.

CPM-i, "Linük nung sorkar agency kari Pegasus spyware amshir asü mamshiar SC nem telangzüba agütsütsü atema sorkari memelung. Telangzüba magütsüsü atema linük security nung ajemdaker jenbuttsü makok ta court-i shiogo, anungji sorkari telangzüba tejanga agütsütsüla," ta ashi.

CPI Rajya Sabha MP, Binoy Viswam-i twitter ajanga, "SC-i linük akhümket yuogo. Ochi mimbangnüba ajanga Parliament nung ni asüngdangba parnoki (sorkar) songtema liasü. Onoki Parliament nung Pegasus atema jembitsü akhangba tim, ta Supreme Court telemtetba ajanga sayuogo," ta metetdaksü.



Mumbai, October 28, 2021: Linük nung petrol aser diesel jenjang maneni atuba anema Brihostibarnü Mumbai nung Aam Aadmi Party (AAP) züngsemtemi longkak aitba noksa nung angur.

Sitharaman G20 joint finance & health ministers senden nung adentsü

New Delhi, October 28 (Agencies): October 29, 2021 nü Rome nung ayongzükba G20 joint Finance & Health Ministers senden nung Union Finance minister, Nirmala Sitharaman adentsü; iba senden nung covid wara nokdangba densema onük aika jembitsü.

Brihostibarnü Finance Ministry-i twitter ajanga, "Union Finance Minister @nsitharaman Rome nung ayongzükba #G20 Joint Finance & Health Ministers senden nung adentsü atema aotsü; iba senden nung COVID-19, wara nokdangba, terenemshiba aser

wara anema inyakba onüktem jembitsü," ta metetdaksü.

Iba senden nung Finance Minister tem aser Health Minister temi wara anema health aser finance minister tem tsüngda amalitepa inyaktsü atema o lemteptsü.

October 29 nü tang mezüng G20 züngsem linüktem nungi Finance aser Health Minister tem telongjem senden amentsü. Iba senden ya Italy economy & finance minister, Daniele Franco aser Italy Health Minister, Roberto Speranza na leniba nung amentsü.



New Delhi, October 28, 2021: India nunger nüchiso anguba sülen küm 75 ajungba nungtem nung Brihostibarnü New Delhi nung 'Farmers-Scientists Connect Meet' sentong nung Minister of State for Science and Technology and Earth Sciences (I/C), Prime Minister's Office, Personnel, Public Grievances and Pensions, Atomic Energy and Space, Dr Jitendra Singh-i Aspirational Districts 75 nungi aluyimer 75,000 den jembiba noksa nung angur.



Infiernillo, Mexico nung Hurricane Rick aruba sülen tüzümsüng adoka alidak gari ka anir aoba noksa nung angur. Hurricane Rick ya Mexico indang southern Pacific tükumlen Hombarnep mopung tesashi ona aser tüzünglu arua süyi aser tükumlen ajungben tüzümsüng adoktsü tekumdangtsü sangdonga lir.

Southeast Asia kübok temesepba mozü timtiba Laos nung apu

Bokeo, Mongputeni/Oct. 28

(Agencies): Laos nung police temi amphethamine tablets million 55 aser crystal methamphetamine tonne 1.5 dak tema bena aliba gari ka pua liasü.

Thailand aser Myanmar den arütsüa aliba Bokeo nung beer crates bena aliba truck ka police temi anendaktsüba nung item temesepba mozü ya nguteta liasü.

Iba tesem dang ya Golden Triangle ta ajar, kong mapang talangka nungi temesepba mozü kanga bulua amshia arur.

United Nations Office on Drugs and Crime (UNODC) atema Southeast Asia regional representative, Jeremy Douglas-i ashiba agi, East aser Southeast Asia otsü nung ibai temesepba mozü timtiba apuba

alitsü.

Kasa tesem nung tawa police temi hopta ka tsünga operation ana nung amphetamine temesepba mozü tablets million 16 pur lia anu iba osang ya angazüker.

UK nung amphetamine tablets ya Class B aser crystal methamphetamine ya Class A lir.

Myanmar kübok Shan state nung mepetmesü aliba ajanga tawa ita ishika tsünga Golden Triangle nung temesepba mozü shibelenba tali kumogo, koba China, Laos aser Thailand den arütsüa lir, ta Douglas-i ashi.

"Kidanger linük aser region ajunga nung methamphetamine agi asünger aser ibai Shan nung tang ajangshia aliba tensa den sendaktepa ali amai temolung meleme bilemer," ta pai ashi.

Myanmar den arütsüa aliba China indang Yunnan arütsülen COVID aser danga security mera tesashi agüja aliba ajanga makoksatsü mechi anüdoklen Laos aser south tsütsü Thailand nung temesepba mozü shibelenba tali akumer amai ajiteter, ta pai ashi.

Item temesepba mozü ya Lao Brewery beer crates nung aleper liasü,

Ajisüaka Lao Brewery Company-i parnok iba temesepba mozü shibelenba nung shilem mali, ta ashi.

"Ozüng alema mapa tamajung inyakba nung ozü indang crates amshiba atema onok mepelar aser company indang oset amshiba atema tekeratiba nung tapet mera agitsü nungnanga malitsü," ta sangdong ka nung shia liasü.

Sudan mitkari envoy trok mapa nungi anentsü

Khartoum, Mongputeni/Oct. 28 (Agencies): Hopta tetenzüklen Sudan mitkartemi tashiyim amshia sorkar atsüngdokba atema alimai taitüsü ola balala adokaka mitkartemi ambassador trok mapa nungi anentsü aser security forces temi democracy busema longkak aiter pua merenshiba maparen tesashiba inyak tenzükogo.

Bodhbarnü menur state media nung sangdongba telemteba nung Sudan indang ambassador to the United States, European Union, China, Qatar, France aser Geneva yimti nung par mission tekolakba densema lir, aser ibai maitkartemi sorkar atsüngdokba magizükba yong inyakba amai angateter.

2019 kümApril ita nüburtemi mapang talangka nungi yimsü süa arusang Omar al-Bashir anema nokdakba sülen pa yimsüsüba menden nungi

atsüngdoker Sudan yimtenren democracy dangi meyipba mapang ka nung Hombarnü mitkartemi tashiyim amshia sorkar atsüngdoka liasü.

Civilian-i aniba transitional government tanaben metenzükshi tashi bloc nung Sudan medendaktsüi atatsü, ta African Union-i Bodhbarnü sangdong, World Bank ajanga teyari soita ayu, United States-i sen million \$700 alang ajungben teyari sen anena ata. Khartoum nung aliba Western embassy aikati mapa nungi anentsür alisang Ato Kilonser Abdalla Hamdok aser par cabinet ya ang Sudan nung chichiba sorkar lenir ta züngshitsü metetdaksü.

Mitkartemi yimten tashi rakzükba anema linük yimtiba, Khartoum aser danga tesemtem nung maneni longkak aiter, kong civil disobedience campaign ka ayongzükba ama shishilempaba tesem aika shibangogo aser

longkak aiter temi lenmangtem mokdang.

Khartoum anüdoklen Burri district kübok yimtong nung atsü yanglua aliba security forces temi loksatsüba mapang longkak aiter noklang aikati long agi aon, ta osangtem ajanga ashir aser yimtiba north tsütsü security personnel temi longkak aiter dak tear gas aser rubber bullets tem khaloktsü.

"Kiyong balala aser lenmangtem nung injang-bomb agi raksatsütsü makokba garitem yua lir aser nisungtem rifles bener senzür, tetsürtem ali nung atsür senzür," ta tang tashi Hamdok sülen aliba information ministry ajanga sangdong ka nung ashi.

Kiyong balala nung aliba committee temi maneni longkak aittsü sentongtem sangdong aser Honibarnü "march of millions" alitsü sentong lir.

(Maneni tapak 9 nung...)

Russia nung COVID-19 cases timba akumer

Moscow, Mongputeni/Oct. 28 (Agencies): Russia nung anogoshi COVID-19 tashidak agi nisung menepba aser asüba timba akumer aser iba tashidak züina akumba den raratsü atema Moscow-i tongtipang masüba service tem anogo 11 atema shibangogo.

Europe nung coronavirus tashidak agi tesashitiba kongshiba linük, Russia nung mozü kar yanglutetaka tagir ajema lir.

Anogoshi iba tashidak putetba aser iba tashidak agi asüba ya tawa timtiba liasü, kong Brehostibarnü nisung tasen 40,096 dak iba tashidak putet aser tesüba ghonda 24 tsünga nisung 1,159 asü, ta sorkar ketdangsürtemi ashir.

Ketdangsürtemi linük aika nung benokba lockdown benoktsü memolunger, saka linük yimtiba, Moscow nung tongtipang masüba services tem Brehostibarnü nungi tenzüka November 7 tashi shibangtsü metetdaksüogo.

School aser kindergarten tem den retail outlets, restaurants, saisapongba aser südoksenemba tesemtem ajunga shibangtsüogo. Chiyongtsü, mozü aser danga tongtipang osettem ayokba dokan tem dang lapoka lir.

Tir Vladimir Putin'er sorkari par linük nung yangluba mozütem, talisa Sputnik V nung tamang akar, saka Russia nungertemi iba mozü magitsü tekong meranga nokdaker.

Brehostibarnü tashinung Russia nung shilem 32 dang mozü course tema agir liasü, ta Gogov website ajanga ashi, kobai COVID-19 data bendener.

Tashidak tali züina akumba

ajemdaktsütsü mechi taoba hopta Putin-i linük tesem ajungalen October 30 aser November 7 tsünga 'paid holiday' sangdonga liasü, aser kasaji

Moscow ketdangsürtemi inyak linük yimtiba nung tongtipang masüba services tem Brehostibarnü nungi shibangtsü totuyuba agütsü.

Moscow nung lenmangtem tamalen dang nungi Brehostibarnep tera tazünga liasü, saka Metro network bo kasa mazüngi liasü aser passenger tem aika mask magi liasü.

Ketdangsürtemi iba mapang Russia nung dang kilung nung alitsü mashi, anungji nisung aika linük tesem balala aser bendanglen senzütsü sentong yanglur.

Black Sea anasa aliba Sochi yimti indang mayor-i raliwalir aika arütsü tekumdangtsü shiogo aser Russia nung Turkey aser Egypt leni aoba tayimtsü indang ticket alir timba kumogo.

Russia nung COVID-19 cases million 8.4 jungnüa aser nisung asüba 235,000 dak tema jangjateta lir, saka ketdangsürtemi iba tashidak wara süoki ia magizük, ta mongintemi ashir.

Statistic agency Rosstat ajanga October ita sangdongba ka nung linük nung coronavirus agi nisung 400,000 dak tema süogo, ta ashi.

Tashidak wara tenzükba mapang tenokdangba tesashi agütsüba sülenbo Russia k e t d a n g s ü r t e m i rongsenketzüng nung timtem ajurutsüsa tenokdangba tali agütsütsü nungnanger aser Russia nung dang mozü agitsü ajungshir.

Singapore nung COVID-19 cases tali akumba bushisüngdangtsü

Singapore, Mongputeni/Oct. 28 (Agencies): Singapore nung COVID-19 cases tasen 5,324 putetba sülen iba yimti nung yimya balaka nung tashidak züina akumba indang bushisüngdang, ta health ministry ajanga ashi.

Bodhbarnü Singapore nung COVID-19 tashidak agi nisung ter asü, aser tang tashinung asür ajak agi nisung 349 alitsü.

"Tanü tashidak putetba ya taoba mapang dang nungi kanga agi timba lir, talisa nikongdang ghonda ishika tsünga testing laboratory tem nung tendangba mapang COVID-19 positive cases aika jangjateta liasü," ta Ministry of Health ajanga Bodhbar aonung sangdong ka nung ashi.

"Mapang tatsüka tsünga danga mapang dang nungi cases tali putetba atema Ministry of Health ajanga bushisüngdang aser ano

anogo ishika kanga junga mita asadangtsü."

Bodhbarnü tashinung Singapore nung COVID-19 tashidak nungi nisung 20,895 pei kidang taneptsü nguteter liasü. Kasa mapang nisung 4,589 community care facilities nung lir, nisung 849 treatment facilities nung lir aser nisung 1,777 mozü kidang anepalur, ta Ministry of Health indang sangdong ajanga ashi.

Tawa tenokdangba kar salaba sülen ano tashidak tali puteta aoba ajanga Singapore nung tenokdangba tali salatsü sentongtem thinener.

COVID-19 tashidak prokshia aoba azüoka healthcare system nem khuret tajemba agütsütsü mechi iba 'city-state' nungya taoba hopta talenba kar atsülanga liasü.

Singapore nütüng yongsük shilem 80 dak tema COVID-19 vaccine agiogo.

Kohima nung Credit Outreach camp tenzüksüogo



Kohima, Mongputeni/October 28, 2021 (TYO): Department of Financial Services, Ministry of Finance, Government of India ajanga October 16, 2021 nü 'pan India' Credit Outreach camp tenzüksüogo. Iba camp ya October 30, 2021 tashi agütsü, ta sangdong ajanga metetdaksü.

Credit scheme, koba alima ajanga asünga COVID-19 wara sülen, rongsenketzüng renlokdahtsüsü atema kanga tongtibang shilem ka kümogo, iba scheme timba kümdahtsüsü nükjidong nung Credit Outreach camp ayongzüker asütsü.

Iba outreach camp dak sendakba nung, Kohima kübok achayangba bank tem nung campaign tenzüksüogo aser iba mapatong ajanga sen cr. 31.10 shi lema agütsüsü atema, tajangzük angutsüpur 460 shimtsü akok.

Brehostibarnü (28-10-2021), tajangzük angutsüpurtem nem 'sanction letter' agütsüsü atema, LCS Building, Kohima nung Lead Bank Office, Kohima ajanga Credit Outreach Initiative Program ka ayongzüka liasü.

Iba sentong nung tongti tesemdang ama Addl. Deputy Commissioner, Kohima, Nagaland, N Bhavani Sri, IAS dena liasü. Kohima kübok bank ajak nungi senior ketdangsurtem aruagi denogo. Kasa sentong nung SLBC Nagaland tenüng nungi Coordinator, H Alpha Pou dena liasü.

Lead District Manager, Kohima, Sosangmeren M-i iba sentong ayongba indang tongmelang agi telok dang metetdaksü. Bank ajak tenüng nung telok pela agizükba mapang, Chief Manager, Bank of Baroda, Kohima, Rajesh Kumar-i, 'financial discipline' indang tongtibangtem metetdakja liasü.

Iba sülen, Assistant General Manager, SBI, Kohima branch, Besii Bosco-i, Central Government viz: Pradhan mantra MUDRA Yojana, Stand Up India, Agri Infra Fund, PMEGP, ECLGS, Mudra yojana, PM SVANidhi, aser tanga Atmanirbhar Bharat Schemes ajanga achayangba scheme balala indang tongmelang agi

metetdaksü.

Covid-19 ajanga timtem/mepetmesü aika adokdaksü yongjia, District nung 'credit' renlokdahtsüsü meranga inyakba atema N. Bhavani Sri, IAS-i bank nung tekolakpurtem dang pelaba metetdaksü.

Lai ashiba agi, Kohima district nung vaccination maparen junga achayangba agidar aser iba maparen takom ngua agiba ajanga nüburtem pei pei mapa atema ayong ayonga senzütetsü aser shishilembaba maparen timba adoktsü.

Laisa, 'Agricultural economy' nung terenlok lidaksüsü atema bank züngsemtem dang yaritsü ajungshio.

Maneni, iba sentong nung N Bhavani Sri-i tajangzük angutsüpurtem nem sanction letter tem lema agütsü, koba district kübok bank balala ajanga agüja liasü.

Iba sentong tembanga, Assistant General Manager, IDBI Bank, Kohima, Rangshong Ping Levis-i tepela anküp o jembi, ta kasa sangdong nung shia lir.

PELABA LEMSATEPER



ASO
15-01-1931

ASÜ
22-10-2021

Asür Y. Ladong Lemtür (Longpa) pa mapang tatsüka shiranga aliba mapang nungi tasüba anogo tashi kidanger kiyonger yimtsür yimer anükapang aser temeimertem kwinaketi sarasadem nübo aser rongsen agi yariogo nenok ajak dang asür kinünger temi kanga pelaba lemsateper.

Tsüngremi nenok ajak molamoshia moajangma.

Temeim Jala, Kinüngbo, anük apang aser kinüngertem.

TSÜNGREM TENÜNG ASANGER

Ao Baptist Arogo Shillong nung Pastor, Rev. Dr. Meyu Changkiri-i teküboklen agüja aliba jenjang ajangzüktemba atema Changkiri Kidong Telongjem, Dimapur-i tepela tulu nung pa nem tenüngsang agütsü:-

1. Ao Baptist Arogo Mungdang Ordination Council ajanga pa Reverend Ordain asü, aser
2. Senate of Serampore, West Bengal ajanga 'Ministerial challenges of Ao Baptist Churches outside of Nagaland' Thesis nung pa nem Doctor of Ministry agütsü.

Tsüngrem Yimli sentüwangshitsü atema tarutsü nunga Tsüngremi maneni na moajangma.



Sd/-
(Imnametongba)
President, CKTD

Pelaba Lemsateper

Longjang Compound Baptist Arogo Associate Pastor Women, Quarter ki yangluba nung kija aser kibong kwikati rongsen, nübu, osettsüset aser sarasadem ajanga yaritepogo, nenok ajak dang kangasa pelaba lemsateper. Nenok teyari ajanga quarter ki kanga junga renemtetogo. Nenok den tsüngdong arua pelaba melemsateper, saka nenok teyari kodanga mamatsü. Asen Teyanglur Tsüngrem-i nenok kija aser kibong tali moajang ta sarasademtsür.

Sd/-
Mrs. Sentinaro
Associate P/W
Longjang Compound Baptist
Arogo, Women Ministry

Sd/-
Miss. N. Merenla Jamir
Secretary
Longjang Compound Baptist
Arogo, Women Ministry

2021-22 kümsük atema FACSU mendenpur shimogo

Mokokchung, Mongputeni/October 28, 2021 (TYO): Bodhbarnü (27.10.2021), 60buba Fazl Ali College Students' Union (FACSU) 2021-2022 General Council Election agia liasü, ta sangdong ka ajanga metetdaksü.

Class Representatives (CRs) shimtsü atema Online mode - 'Google Cloud based Application' ajanga mezüng shilem (First Phase) agi. Faculty, Department of Computer Science FAC ajanga iba Application yanglua liasü.

Iba menden (CRs) atema CR 22 agi toktepa liasü, kong CR 19 tashi FACSU General Council nung shimogo.

Executive Council atema Election/Nomination indang tanabuba shilem (Second Phase) college nung agia liasü. CRs temi 'Nomination/Bond Papers file asüba sülen, Executive Council nung post atema asadangshia liasü. Iba sülen, CR indang 'Academic Records' den külemi :Personality Quality' nung asadanga Screening Board ajanga parnok interview agi.

2021-22 kümsük atema FACSU mendenpur (Executive Council) tasentem teküboklen agüja aliba ama asütsü. Post tazüngla tem (Vacant posts) mapang tetemjen nung FACSU President ajanga nominate asütsü.

1. Vice-President
BA/BSc 3rd & 5th Semesters

nungi President ajanga nominate asütsü.

2. General Secretary
Lanutangit (BA 3rd Semester)
3. Assistant General Secretary
Tiakaba Walling (BSc 3rd Semester)
4. Games and Sports Secretary
Merensunep Walling (BA 5th Semester)
5. Assistant Games and Sports Secretary
Supongwati Jamir (BA 1st Semester)
6. Social Service Secretary
Ayangshi Jamir (BA 3rd Semester)
7. Assistant Social Service Secretary
Tolibo (BA 1st Semester)
8. Fine Arts and Literary Secretary
E. Esther K (BSc 3rd Semester)
9. Assistant Fine Arts and Literary Secretary
Rongsenpokla Pongentsur (BSc 1st Semester)
10. Magazine Secretary
BA/BSc 3rd & 5th Semesters nungi President ajanga nominate asütsü.
11. Assistant Magazine Secretary
Viketo N Chophi (BA 5th Semester)
12. Boys Welfare Secretary
Zapuwe Akami (BA 5th Semester)
13. Girls Welfare Secretary
Alemlila Imchen BSc 5th Semester)

Maneni, Mongolbarnü sangdong ajanga CLASS REPRESENTATIVES, ONLINE FACSU ELECTION, 2021-2022 atema QUALIFIED INTENDING CANDIDATES dak sendakba nung metetdaksüba ama, 'Sl. No. 3 BA 5th Semester' aser 'Sl. No. 4 BSc 1st Semester' kübok Class Representatives post ya aruya aliba FACSU General Council (2021-22) seden nung FACSU President ajanga nominate asütsü.

Sudan mitkari envoy trok mapa..

(Tapak 8 nungi...)

General Abdel Fattah al-Burhan-i transitional government aser linük nung yimsüsür temaba Sovereign Council Hombarnü anentsü aser sepaitemi Ato Kilonser Abdalla Hamdok densema ketdangsurtem aika apu.

State of emergency sangdongaka democracy busema longkak aiter nisung meyerijang aika Khartoum aser Omdurman yimti nung adenshia liasü. Longkak aiter dak security forces temi injang khaloktsü aser iba mapang nisung tenet asü aser aika yiru, ta doctor temi ashi.

Sorkar atsüngdoker

osangbener senden nung Mongulbarnü mezüng jembiba mapang, mitkar anema nokdaksü ajungmesoba yimten yimsüsürtem agientsüsa akum, ta al-Burhan-i shia liasü.

"Taoba hopta asen nuk agi anguba lendong tem ajanga linük ya civil war leni anir aotsü liasü," ta al-Burhan-i ashi, shibai 2023 küm July ita election agitsü nangzüka lir aser kasa mapang technocratic government shimtsü ashi.

Ajisüaka mitkartemi tanem tanemi tashi ajunga amshia yimsü asütsü tebilemba lir, ta parnok anemertemi ashir, kechiaser al-Burhan-i

Sovereign Council indang tashi ya hopta ishika tsüngta civilian nem agütsüsü liasü.

Sudan atema United Nations special envoy, Volker Perthes-i Bodhbarnü al-Burhan ajuru aser constitution kübok transition maparen meyipa agütsüsü aser pua alirtem chioktsü ashi.

Perthes-i Hamdok den par kidanga ajurua liasü, kong pa tanükba kübok lir, ta odongtar Stephane Dujarric-i ashi.

France, Germany, Norway, United Kingdom, US aser EU nungi envoy temi Hamdok semdanga liasü, aser pa temang anema lir, ta ashi.

Tongteprateptsü atema : M- 9856486841 / 8258802047
Mapang - Aonung : 5:00 PM. Anepdang: 9:00 AM.
Nikongdang : 12:00 PM

NSF Trophy: Mele FC aser Mhakenyi Kro-u na quarter tongogo



Kohima, Mongputeni/October 28, 2021: Mele FC aser Gaziphema FC tsungda NSF Martyrs Memorial Trophy asayaba mapang tangokba noksa ka yangi angur.

Kohima, Mongputeni/October 28, 2021 (TYO): Indira Gandhi Stadium kübok tang tasayadak NSF Martyrs' Memorial Tournament, koba

Women's Senior One Day Trophy 2021-22: Nagaland-i Manipur kokogo

Dimapur, Mongputeni/October 28, 2021 (TYO): Brehostibarnü, Women's Senior One Day Trophy 2021-22 cricket asayamung nung, Nagaland Senior Women's Team-i ayong ayonga dang kidanger state Manipur kokogo. Nagaland team-i 'VJD Method' ajanga Manipur madak run 91 agi takok angu.

'Plate Group' atema Women's Senior One Day Cricket ya Kolkata nung asayadar.

Nagaland-i toss koka batting asütsü shim aser over 50 nung parnok run 239 yanglua 'batter' ajak out süadok.

Iba asaya nung, Nagaland team nungi Poonam Khemnar-i century yanglua liasü. Tan season (2021-22) atema Nagaland tenung nungi Poonam ya 'Guest player' ama asayar. Poonam-i 4' tuku aser 6' ka densema ball 126 nung run 105 yanglutet.

Poonam-i century yanglutetba den külemi,



Poonam Khemnar

Nagaland State atema BCCI Domestic match nung century yanglur tetsür rongnung la mezüing kümogo.

She also became the First woman to hit a Century in the BCCI Domestic matches for the Nagaland State.

Kasa asaya nung, Nagaland team nungi Kiran Navgire-i run 43 yanglua liasü. Kiran-i 4' tenet aser 6' ka zükloksü. Nagaland run 8 alidang, opener batter Ritu

U-23 Asian Cup qualifiers: India-i UAE makok

Dubai, October 28, 2021 (Agencies): Fujairah Stadium kübok AFC U-23 Championship Qualifiers nung India aser asayamung tayonger team - UAE na asaya liasü. Iba asaya nung UAE-i penalty kati India madak goal 1-0 agi takok angu.

Group E nung asaya ana tashi kasa yimya nung tembang. Kasa group asaya tanga ka nung, Oman-i asaya tatemlen penalty ka inokja Kyrgyz Republic madak takok nguogo.

UAE atema Abdulla Idrees-i minute 82buba nung penalty ka idaktsü.

UAE den asaya mapang mid-field akangshidaktsütsü atema India coach Igor Stimac-i team nung asayar ka dang melen, kong Aniket Jadhav melena Lalengmawia anioka asayadaktsü.

Taoba asaya tanga ka nung India team-i Oman madak goal 2-1 agi takok ngua lir.

Tang, U-23 Asian Cup

takok anguba sülen team anaprongla quarter final tongogo.

Brehostibarnü, mezüing match nung, Mele FC Noklak aser Gaziphema FC na asaya liasü. Iba asaya nung Mele FC Noklak-i goal 1-0 agi Gaziphema FC tsükdaktsü. Mele atema Longkhoh-i minute 35buba nung goal ka inoktsü.

Kasa asayamung tanabuba match nung, Mhakenyi Kro-u aser Morning Football Association na asayaogo, kong Mhakenyi-i goal 4-0 agi MAF tsükdaktsü.

Iba asaya nung Yunshalo-i minute 20buba, 27buba aser 57buba nung hat-trick idaktsü aser külem team nungi minute 66buba nung Kevin-i goal pezübuba bendenlokja liasü.

Maneni, iba asayamung quarter final tanabuba nung, takok angur team ana (Mele FC aser Mhakenyi Kro-u) tsüingda asayatsü.

Hokolbar (29.10.2021)

- atema asaya yamai alitsü:**
1. Viswema FC vs Bandits FC @ 12:30 PM
 2. Asüfü Christian Institute, Manipur vs HeadHunters, Jakhama @ 2:00 PM

tukadokba sülen, Poonam aser Kiran nati team atema run 72 bendenloktsü.

Nagaland team nung middle order batter temi run kar bendenloktsü aser tesüsa batter Merensola-i ball 23 nung run 28 yanglutet aser lai 6' pezü zükloksü liasü aser team-i run 239 yanglur innings atemtsü ball ka anünga lia wicket tatembuba out süadok.

Manipur team nungi Kiranbala aser Niruta nati wicket asemsem agi.

Tanabuba innings nung, light majung ajanga Manipur team-i run 91 (VJD Method) agi iba asaya makok.

Asaya anenba mapang, Manipur team-i over 40 nung run 126/8 yanglur liasü. Nagaland nungi Poonam aser Kiran nati wicket anana agi. Kasa mapang, Merensola, Limatola aser Elina nungeri wicket ka ka agia liasü.

Deobarnü (31/10/21) Nagaland aser Jammu & Kashmir asayatsü.

qualifiers Group E table nung team pezüprongla (India, UAE, Oman aser Kyrgyz Republic) point asemsem ngua lir.

Iba group nung temaba jenjang tongtetter team-i sangküm Uzbekistan nung final atema qualify asütsü. Kasa mapang best runner-up team (linük) pezü tashi temaba team den asayatsü maongka angutsü.

Honibarnü (30.10.2021) Group E nung India-i Kyrgyz Republic den asayatsü.

2buba Kohima District Chess Championship tenzükogo

Kohima, Mongputeni/October 28, 2021 (TYO): CANSSEA Building, Bayavü nung Kohima District Chess Association (KDCA) ajanga ayongba '2nd Kohima District Chess Championship' tenzükogo. Iba chess asayamung nung asayar 21 agi shilem agidar, ta sangdong ajanga metetdaktsü.

Anogo asem tashi asayatsü aliba chess asayamung lapokba sentong nung, tongti tesemdang ama KDCA ngutetsang aser mezüing president, Visanyüzo Kuotsu aruagi dena liasü.

Kuotsu, shibai 2005 nungi 2013 küm tashi national aser international Chess championships nung state tenüing nungi asayaogo, iba sentong nung shilem agir ajak dang iba asaya (chess)

akhümtsübuttsü asoshi pai ayongzük.

KDCA President Kedihoto Puro-i ashiba agi, tejangraba tulu alir saisapongertem nem sabang ka agütsüba ajanga iba asaya nung parnok tali ajungmesotsü Association nükjiding lir.

Kohima District Chess Championship nung takok angurtem (general category) nem - 1st - senpet 15,000, 2nd - sen. 10,000, 3rd - sen. 7,000, 4rd- sen. 5,000 aser jenjang pungobuba nungi terbuba nung takok angur shia nem senpet 2,000 (2,000 each) agütsütsü terenemba lir. Maneni, Under 14 category nung takok angurtem nem - 1st - senpet 6,000, 2nd senpet. 4,000, 3rd - senpet 3,000 aser 4rd - senpet. 2,000 agütsü, ta kasa sangdong nung shia lir.

India-i badminton asayamung asem ayongzüktsü: BWF

New Delhi, Mongputeni/October 28, 2021 (Agencies): Sangküm January (2022) ita Odisha Open (badminton asayamung tasen) densema, India-i badminton asayamung asem tashi atonga ayongzüktsü renemdar, ta Brehostibarnü BWF ajanga sayaba international calender nung shia lir.

India Open Super 500 badminton asayamung, koba alima ajunga asüingba coronavirus wara ajanga 2020 aser taküm küm tetenzüklen thinena liasü, iba asayamung sangküm mezüing asayatsü. India Open Super 500 asayamung ya January 11, 2022 nungi tenzükü January 16, 2021 tashi asayatsü.

Ano Syed Modi International Super 300, koba küm tanabuba atema Badminton World Federation (BWF) ajanga September ita thinena (Covid-19 ajanga) liasü, iba asayamung January 18 nungi tenzükü January 23, 2021 tashi asayatsü.

Asayamung anaprongla temer sülen, January 25 nungi 30, 2021 tashi Odisha Open Super 100 asayatsü.

Hyderabad Open Super 100 tournament, koba 2020 küm aser taküm thinena liasü, 2022 calendar nung iba asayamung maden.

"HSBC BWF World Tour calendar ya Asia aser European tournament ajunga

nung külemi ayongba asayamung nung ajemdaker yanglu, kong asayamung ayongba tesem nung senzüsenbongtsü junga achaayangtetsüla," ta BWF-i sangdong ka ajanga metetdaktsü.

Super 100 tournament talila calendar nung bendenloktsü asoshi jembishinüdar, ta BWF-i shisem.

BWF Secretary General Thomas Lund-i ashiba agi, "Asayartem Covid lendongbang nungi kümzükü ayutsü nükjiding yur mera balala agia aruogo aser International asayamung tem tenzükshitsü atema lenmang ka lapoker ama, January 2021 ita Thailand nung Asian Leg takok ngua asayaba asadangteta, sangküm 2022 atema BWF Tournament Calendar nung kidanger linüktem ajak külemi shilem agitettsü asoshi :cluster tournament' kar renema lir."

"2022 küm BWF-i tekümdangtsü meratem nung anidaka item asayamung ayongzüktsü akok," ta Thomas-i ashi.

"Ajsüüaka, Covid-19 tensa tera süngjema akümba asadangteta talenba/tenokdangba kangarabo melii international asayamung tem ayongzükter asünung, 2022 küm BWF-i COVID-19 tenokdangba/temzüing tem calendar ya Asia aser Thomas-i shisem.

BILEMDANGANG

"Pei ajungba shisangnüdang aikati takoksa ajurur."